



30. august 2024

UKA 2024/134

Inatsisartut Suleriaasianni § 36 naapertorlugu apeqquteqaat aallaavigalugu siunnersuut imaattoq matumuuna saqqummiuppara:

**Tusassimut aningaasaqarnikkut pilersuisuinissamullu innarliinngitsumik sumiiffinni internetikkut attaveqaatiluffiusuni attaveqaatit allat atorsinnaalernissaat periarfissanngortissinnaanersoq pillugu apeqquteqaat aallaavigalugu oqallisissiatatut siunnersuut.**

(Inatsisartunut ilaasortaq Aqqalu C. Jerimiassen, Atassut)

Monopol uani imminermi pineqanngilaq, suliasatulli Tusassimiit kivinneqarsinnaanngitsaq aaqqiissuteqarfigiumallugu saqqummiussaalluni.

Nassuerutigisariaqarparpummi sumiiffippaalunni attaviit pitsaanerpaajunngitsut. Atassummiillu pissusissamisoorsorinngilarput pinngitsaaliineq atorlugu taakkununga Tusassimut atuisussanngortitsineq, pingaartumik allamik periarfissaqartillugu. Assersuutigiinnarlugumi Starlink.

Paasilluarparput Tusass siammasinnerpaamik atuutissappat, akikinnerpaamillu ingerlassappat - amerlanerpaaniit atorneqartariaqartoq. Aningaasartuutimmi annertoorujussuit attaveqaateqarnikkut atortorissaaruterpassuarnut annertupput. Taamaakkaluartorli sumiiffinni Tusassimiit iluamik sullinneqarsinnaanngitsuni Starlink sukkanerujussuarmik attaveqartitsisinnaasoq atorneqaqqusaanngilaq. Inoqarfiillu mikisorparujussuit taakkuupput eqqugaanerpaat.

Tusass pitsaasumik sullissili, inoqarfiit mikinerit pilliutiginnikkaluarlugit. Ilimaginngilarpummi sumiiffinni attaviluissortuni Starlink atorsinnaalerpassuk Tusass aningaasamiilissasoq, immaqaluunniit killormuani allaat aningaasartuuterparujussui ilai sipaarutigineqarsinnaalissasut. Taamaattumik pingaarsorivarput una apeqqut oqallisigissallugu, sumiiffinni sumi qanorlu attaveqarnikkut pitsaanerulersitsissagutta Tusassilu innarliinngikkaluarlugu allanik periarfissanik toqqaasoqarsinnaalissappat.

Ilimaginngilarputtaaq sumiiffinni ataasiakkaani attaviluissortuni Starlink periarfissaalissappat Tusass soraarsitsisariaqalissasoq, illuatungaanilu immaqa sipaarfiutaasinnaalissalluni, immaqalu atuisunut allanut akikinnerulersitsisinnaassalluni.